

HEADLINES (EVENING)

Date – 26/07/2024

Time - 18:30 -18:40Hrs

- AH&Vety. Minister Pu C. Lalsawivunga chuan Mizoramin kum 38 a liam hnu pawha sa, artui leh bawngnhnutea a la intodelh lo fo chu ngaihtuah chian a tul a ni a ti.
- MPCC Vigilance Cell chuan CBI hnena remtihna, general consent pek chungchangah thudik ziktluak lo sawiah Chief Minister Pu Lalduhoma an puh.
- Sawrkar laipui chuan kum 2027 March ni 31 hmain Pradhan Mantri Bharatiya Janaushadi Kendra (PMBJKs) 25,000 hawn belh a ni ang a ti.
- Prime Minister Narendra Modia chuan vawiin khan Kargil Vijay Diwas vawi 25naah Kargil indonaa sipai thite zahna a hlan.



AH&VETY. MINISTER

AH&Vety. Minister Pu C. Lalsawivunga chuan state puitlinga Mizoram hlankai a nih atanga kum 38 liam hnu pawha sa, artui leh bawngnhnutea intodelh tura hmalak a ni chung a vawiin thlenga Mizoram a la intodelh lo fo chu ngaihtuah chian a tul a ni a ti.

Vawiina Vety. Polyclinic Hospital Conference Hall, Aizawla Veterinary Diploma Holder Association (VDA) General Conference vawi 26-na a hmanpuinaah Minister chuan he thu hi a sawi a. Minister chuan AH& Vety. Department-in hmasawn turin hma lam a pen mek zel a, hemi kawngah hian mawhphurhna theuhte tha taka hlenchhuah a ngai a ni, a ti a. ASF hrileng avangin Mizoramah vawk vulhtute'n harsatnate nasa tak an tawh mek thu sawiin, AH & Vety. Department thawktute lakah mipuite'n beiseina sang tak an nei a, ran damlo enkawl kawngah Department hnuai a thawktute'n theihtawp an chhuah tlan zel a ngai a ni a ti.

Minister chuan AH & Vety Department chu kuthnathawktute tana ding leh thian tha tak a nih angin an harsatna hriatpuia tanpui tura mamawh an nih phawt chuan ran vulhtute panchilh an inhuam reng tur a ni, a ti a. Sa, artui leh bawngnhnutea intodelh turin ran chawa intodelh hmasak a pawimawh thu leh hemi kawngah hian sawrkarin theihtawp chhuaha hma a lak chhoh mek thu a sawi a ni.

Veterinary Diploma Holder Association (VDA) hi May ni 22, 1981 ah din a ni a, member 129 an awm mek a ni.



LESDE MINISTER

Labour, Employment, Skill Development & Entrepreneurship (LESDE) Minister Pu Lalngchinglova Hmar chuan ram hmasawna tur leh thanlenna tura suangtuahna te chu entrepreneurship kaltlangin a tak ramah a chang dawn a ni a ti.

Vawiina Mizoram University (MZU) Incubation Centre hnuai a “Entrepreneurship Development Centre” a hawnnaah Minister chuan he thu hi sawiin vawiinah hian building an hawng satliah a ni mai lova, hmahlir, vision an tlangzarh tel a ni a ti a. Minister chuan entrepreneurship programme kaltlangin Mizo thalaite talent peipun a, chhawr tangkai a ni dawn a ti a, chu chuan ram ei leh bar dinhmun a ti thanglian dawn a ni a ti. Minister chuan entrepreneurship in thil thar ngaihtuahchhuahna, innovation chu thalaiteah a chhem alh ang a, chu chuan eizawna ngialnghet leh khawtlang hmasawna a hring chhuak dawn a ni a ti.

Hawna inkhawmah hian khualzahawm Mizoram University Vice Chancellor Prof. Dibakar Chandra Deka chuan incubation centre te siamchhuah Application pahnih - Sentezel leh Thlado a tlangzarh nghal bawk a ni.

<><><>

GST TRAINING

Mizoram Sorkar hnuaiia Taxation Department leh GSTN tangkawp chuan nimin leh vawiin khan GST Training an buatsaih chu vawiin khan Taxation Minister Dr. Vanlalhlana hoin a kharna hun hman a ni.

Training-ah hian Tax officer ten chhiah pe tha duhlote chung a hmalak dan an zir a. Training pe tur hian GST Council in GST system siam tura mawhpurhna a pek, Goods and Services Tax Network (GSTN) Headquarters, New Delhi atangin trainer pathum an lo kal a, Taxation Department Auditorium ah training hi neih a ni.

Training hawna inkhawmah Commissioner of State Tax Pu R Zosiamliana chuan Mizoram sorkar-in sum harsatna a tawh mek dante, Taxation Department chu Mizoram sorkar hnuaiia revenue laluttu Department zingah a thawh hlawk ber anih thu te a sawi a, Tax Officer te chu thahnemngai turin a fuih a ni.

Training ah hian GST Dan hnuaiia Enforcement leh Audit zir ho a ni a. He training-a an zir, GST Enforcement hnuaiia hian Tax Officer te chu chhiah lakna bungrua khawi hmunah pawh endik theihna turin thuneihna pek an ni a. Bungraw phurtuten document felfai an neih loh chuan an bungrua leh a phurtu motor thlengin man theih an ni. Chhiah petuten an pek dik leh dik loh enfiahna dan, GST Audit hnuaiia hian dawr hmun mai bakah kudam endik theihna turin Tax Officer te thuneihna pek an ni a. Pe kimlo emaw lo awl ru emaw an awm tih hmuhchhuah anih chuan an chhiah awl ruk bakah chawi tur dang an pek an pek a ngai thin a. An pe duhlo anih chuan GST danin a phal angin an thil neih hrensak leh lilam sak theih an nih bakah an bank account thlengin tih thih lailawk theih a ni bawk.

<><><>

MPCC VIGILANCE CELL

MPCC Vigilance Cell chuan vawiin khan Aizawl Press Club ah chanchinbumite kawmin CBI hnena remtihna, general consent pek chungchangah thudik ziktluak lo sawiah Chief Minister Pu Lalduhoma an puh.

MPCC Vigilance Cell hotute chuan Mizoram Peoples' Forum (MPF) hruaitute hnena Chief Minister Pu Lalduhoma'n CBI hnena ram dan tharin a phut ang thlapin general consent an pe' tia chanchinbu leh social media-a thehdarh chu thudik ziktluak lo a nih thu sawiin, Mizoram mipuite rilru hruai sual tumna a awm ni a an hriat thu an sawi a. Chief Minister in "ram dan tharin a phut" a tih Indian Penal Code, 1860 thlaktu Bharatiya Nyaya Sanhita, 2023 ni a a lan thu sawiin, CBI consent pek chungchangah he dan thar hian engmah phut a nei lova, CBI Director in State tin te hnena lehkhah a thawn dungzuia ZPM sawrkarin remtihna thar an pek kumin July ni 1 a Mizoram Gazette Notification a an chhuahah pawh khan he "dan thar" hi sawi lan a nih loh thu an sawi a ni.

MPCC Vigilance Cell chuan Chief Minister in kum 2023 MLA inthlan campaign laia CBI hnena "general consent" pek a tiam thin leh sawrkar thar pian hnuaiia Mizoram Legislative Assembly session hmasa ber neih lai, kum 2023 December ni 14-a a sawi, sorkar kalta in Lokayukta atanga CBI hnena pek rawtna pathum lo dang chata pek phal loa a sawi, an ni erawhin general consent an pek tur thu leh, engmah phalna an dil a ngai dawn lo a a sawi tuma general consent a sawi leh tuna general consent an pe ti si a July 1 a Gazette Notification an chhuah Mizoram sawrkar hnuaiia public servant te CBI in an chhui hmian State sawrkar phalna ziaka lak hmasak phawt tur a ni an tih leh si chu a in kalhin chhun leh zan ang a ni an ti a.

MPCC Vigilance Cell hotute chuan thudik ziktluak lo hmanga mipui rilru kaihhruai tum bansan turin Chief Minister chu an ngen a ni.

<><><>

SIAHA LEGAL METROLOGY ENFORCEMENT SQUAD

Vawiin khan Legal Metrology Enforcement Squad-te chuan Siaha khawpui chhunga insakna bungrua - Iron rod zuar te hralh dan an enfiah.

Legal Metrology Enforcement Squad te chuan sorkarin Electronic Weighing Scale hman vek tawh tura thu a chhuah tawh anga dawr tin deuh thawa Electronic Weighing Scale an kawl vek ta chu lawmawm an tih thu an sawi a.

Electronic Weighing Scale kawl reng si, hmang lova customer hnena hralh, rod zuar pahnih chu man an ni a, Legal Metrology dan hmangin hremna pek an ni ang. Heng rod zuar te hian an customer te - Tisi khaw mi leh Kaisie khaw mi te chu buk loh leh buk tlinglo in rate tlawm zawkin an lo leitir mek a, chu chu Legal Metrology department te hian va nang chingin an man nghal a ni.

Heng rod leitu pahnihte hi Legal Metrology thawktute te awmlai ngeiin a buk tlingin pek tir leh vek an ni a. Legal Metrology department sawi danin rod zuar thenkhat te hian buk tlinglo in man tlawm zawka hralh turin an rod te an zuar thin a, a bum theih theih chu bum an hrehlo hle a. Legal Metrology dept chuan mipui te chu rate tlawm, buk tling silo ai chuan rate pangngai buk tling lei a hlawk zawk tih hre thar leh turin an chah a ni.

<><><>

NEW CRIMINAL LAW TRAINING

Vawiin khan Govt. Mamit College-ah dan thar, criminal law thar pathum leh Intellectual Property Rights zirho a ni.

Dan thar pathum zirhona hi Mamit District Legal Services Authority leh Intellectual Property Rights Cell, Govt. Mamit College tangkawp buatsaih a ni a. He dan thar pathum leh Intellectual property rights zir hona hi chawng hniha neih niin a chhawngkhatna-ah hian The Bharatiya Nyaya Sanhita, 2023, The Bharatiya Nagarik Suraksha Sanhita, 2023 leh The Bharatiya Sakshya Adhinyam, 2023 dan thar pathum te chu Mamit District Chief Judicial Magistrate Pu H. Laldusanga chuan zirtirin, dan hriat a tulna leh dan pawimawhna leh hriat chian tulzia te a tarlang a.

Chhawng hnihna Intellectual Property Rights zirhona hunah Trademark Law chungchang chu Judicial First Class Magistrate Pi Esther Zorini Hauhnar in a zirtir a, Plagiarism chungchang chu Asst. Professor Pu Rohmingthanga Ralte in a zirtir bawk a ni.

<><><>

PMBJKs

Sawrkar laipui chuan kum 2027 March ni 31 hmain Pradhan Mantri Bharatiya Janaushadi Kendra (PMBJKs) 25,000 hawn belh a ni ang a ti. Lok Sabha-a ziaka zawhna chhangin Union Minister of State for Chemicals and Fertilizers Anupriya Patel chuan thla hmasa thleng khan ramchhungah Primary Agriculture Credit Society ten PMBJ Kendra 547 an din tawh a ti a. Pi Patel-i chuan Pradhan Mantri Bharatiya Janaushadhi Pariyojana hnuaiyah damdawi chi 2047 leh inzaina leh damdawi lam bungrua 3000 chuang zawrh a ni a ti bawk.

<><><>

KARGIL VIJAY DIWAS

Prime Minister Narendra Modia chuan vawiin khan Kargil Vijay Diwas vawi 25naah Kargil indonaa sipai thite zahna a hlan. Thusawiin Pu Modia chuan Ladakh-in Kargil Vijay Diwas vawi 25-na hmel a hmu thei chu lawmawm atih thu a sawi a. Kargil Vijay Diwas hian ram tana nunna hlante thil tih ropui tak a tarlang a ni a ti a. Pakistan beiin Pu Modiaw chuan Jammu adn Kashmir-a firfiaka chetnaah mawphurtu an nih thu sawiin firfiakte hmachhuanin kahwvel politics ah dinmun

siam a tum a nia ti a. India sipaiten firfiakte chu an nuai chimit vek dawn a, an hmelma te chetna chu na takin an chhanglet zel dawn a ni a ti bawk.

<><><>

PM MANN KI BAAT

Prime Minister Narendra Modia chuan tun Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hmang leh dawn a. Mizo tawnga lehlinin a zuiang. Tun tum ami hi episode 112-na tur a ni.

Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestream a ni ang.

<><><>

PARIS OLYMPIC

Zaninah Paris Olympic tan a ni dawn. Opening Ceremony hman anih hma atangin inelna thenkhat tan a ni a. Nimin khan mipa leh hmeichhe thalkah intihsiakah India aiawhte an inlan a. Mipa team leh hmeichhe team ten ranking round ah quarter final an thleng a. Tun thla ni 28 ah khelchhunzawm a ni ang.

Paris Olympic hi zanin dar 11 ah hawna inkhawm ropui taka hman a ni ang

<><><>